

10 JUL 2003

Mahathir-Ukraine/I

DR MAHATHIR BERLEPAS KE UKRAINE MELALUI LONDON

KUALA LUMPUR, 10 Julai (Bernama) -- Perdana Menteri, Datuk Seri Dr Mahathir Mohamad berlepas ke London malam ini, untuk mengadakan lawatan rasmi selama empat hari ke Ukraine, bermula pada hari Ahad ini.

Dr Mahathir berlepas dengan jet kerajaan dari pangkalan Tentera Udara Diraja Malaysia di Subang pada kira-kira pukul 11 malam.

Yang turut berada di pangkalan menghantar beliau adalah Menteri Perumahan dan Kerajaan Tempatan, Datuk Seri Ong Ka Ting, Menteri Kesihatan, Datuk Chua Jui Meng, Ketua Setiausaha Negara, Tan Sri Samsudin Osman, Timbalan Menteri Di Jabatan Perdana Menteri, Datuk M. Kayveas dan Ketua Menteri Melaka, Datuk Seri Mohamed Ali Rustam.

Perdana Menteri akan disertai oleh isterinya, Datin Seri Dr Siti Hasmah Mohd Ali di London.

Pada hari pertama lawatannya itu, Perdana Menteri akan mengadakan pertemuan dengan Presiden Ukraine, Leonid D. Kuchma, Perdana Menteri, Victor Yanukovych dan Speaker Parlimen Ukraine, Volodymyr Lytvyn, sebelum diraikan dalam satu majlis makan malam oleh Kuchma dan isterinya Lyudmyla Kuchma.

Pada hari kedua, Dr Mahathir akan melawat Pelabuhan Odessa, di mana beliau dijangka akan menyaksikan majlis menandatangani perjanjian satu projek usaha sama. Beliau juga akan melawat kemudahan simpanan minyak sawit di pelabuhan itu.

Beliau kemudiannya dijadualkan untuk mengadakan pertemuan dengan pelajar Malaysia di Ukraine.

Pada hari terakhir lawatannya, Dr Mahathir akan melawat Istana Livadia dan memandu uji beberapa kapal tentera laut sebelum bertolak balik ke negara pada tengah harinya.

-- BERNAMA

NN SR AZH